



## STEP 2 STATEM WOK WETEM OL KOMUNITI



### Objektif



Long step ia bae yumi statem wok wetem ol komuniti we yumi selektem finis.

Mein wok we bae yumi karem aot long step ia hemi blong mekem tingting blong DRR program bae i klia gud long komuniti mo ol lida, mo mekem sua se oli wantem patisipet plenti long ol aktiviti.

Blong mekem hemia yumi mas mekem sua se yumi:

- Presentem ol aktiviti blong DRR program i go long komuniti blong mekem komuniti i kasem gud from wanem hem i impoten blong mekem ol wok ia mo wataem bae oli mekem.
- Setemap wan Komuniti Disasta mo Klaemet JensKomiti (CDCCC) we i glad blong stanap from ol memba blong hem blong oli kasem gud ol wok blong mekem.
- Manejem ekspektesen blong ol komuniti blong mekem sua se i nogat mis andastanding mo bae komuniti i gat pawa blong patisipet long ol aktiviti.
- Save mekem ol beis laen sevei blong kasem ol infomesen long komuniti.

### Ki infomesen



Step2 hemi impoten tumas from CDCCC nao bae i lidim ol wok blong disasta. Taem ia nao bae yumi statem Komuniti Disasta Plan blong komuniti wetem rejistresen fom blong ol CDCCC.





## AKTIVITI 2.1: PRESTEM DRR PROGRAM

### Objektif



- Mekem klia long komuniti tingting blong DRR program.
- Stretem ol rod blong wok wetem komuniti.

### Taem blong karemaot wok



- 2 hawa.

### Fasin blong karemaot wok:



- **Singaotem wan jenerol miting** wetem ol komuniti, jif mo lida blong vilij mo Eria Kaonsel Sekretari (ACS).
- **Mekem wan awenes** blong talem from wanem hem i impotem blong mekem DRR program (yusum ol posta mo video). Eksplenem gud se Vanuatu hem i sekon kaontri we hem i kasem moa impak long ol disata long wan UN repot blong "World's Disaster Zone".
- **Presentem besik toksave long Disasta Risk Ridaksen** mo NDMO strakja mo netwok blong Komuniti Disasta mo Klaemet Jens komiti (CDCCC), olsem oli eksplenem long peij 42. Yu save yusum CDCCC rol mo risponsibiliti flip jat blong givhan long yu.
- **Presentem step by step blong CBDRR** (peij 12), eksplenem gud wanem bae hem i ol risponsibiliti blong komuniti mo blong ol ejensi we oli mekem program ia.

### Ki infomesen



- Askem Eria Kaonsel Sekretari blong kam tekem pat long awenes ia.
- Mekem sua se ol man oli kasem gud tingting blong program.

### Materiel mo risos



- Fanem ol awenes posta mo video long: <http://www.vanuatuedcross.org/resources/>.
- DVD - CDCCC Rol mo risponsibiliti flip jat.



## TUL: CDCCC ROL MO RESPONSIBILITI

**CDCCC rol mo risponsibiliti flip jat** hemi wan tul we ol fasiliteta bong DRR oli save yusum blong helpem olgeta blong kliarem ol rol mo risponsibiliti blong ol CDCCC. I gat soft kopi long DVD. Yu save printim i go long A3 long tugeta saed mo baedem.



Insaed igat ol fasiliteta not mo samfala eksesaes blong mekem.

**CDCCC rol mo risponsibiliti hanbuk** hemi wan tul we yumi save givim i go long CDCCC mo jif blong oli gat rikod blong ol trening.

I gat ol semak infomesen nomo.



**NASIONAL LEVEL**  
**PROVINSOL LEVEL**  
**KOMUNITI LEVEL**



**COM – Council Of Ministers** oli apruvum ol emejensi aksen plan afta long wan ddisasta mo givim otoraesesen blong yusum mani blong gavman. Oli save rikwestem sapot long ovasi.

**NDC (National Disaster Committee) - Nasonal Disasta Komiti** i wok blong olgeta mekem ol rispons mo rikavari long taem blong ol emejensi mo disasta o taem i gat wan disasta we i kilim Vanuatu. Oli endosem aksen plan blong givhan long ol pipol (Humanitarian Aksen Plan). Insaed long bodi ia i gat ol DG blong samfala ministri long gavman, NDMO, VMGD, VRCS mo ol narafala bodi.

**NAB - Nasonal Advaeseri Bod** hemi sekretari blong NDMO mo VMGD. Oli Endosem ol dokumen mo ol tingting we yumi yusum blong daonem ol risk.

**NDMO - Nasonal Disasta Managemen Ofis** hem i wan gavman dipatmen we hem i lukluk long rere, rispons mo rikavari. Taem long wan rispons oli kompaelem ol provinsol damej ripot mo mekem ol proposisen blong aksen plan wetem ol patna. Oli kodinetem teknikal asesmen mo rispons long nasonal level long taem blong disasta.

**VMGD - Vanuatu Meteo mo Geohazat Dipatmen** hemi wan gavman dipatmen we hem i stap lukluk mo folemap ol naturol hasat mo givim fes alet i go long NDMO mo ol pipol.

### **PDCCC (Provincial Disaster and Climate Change Committee)**

- **Provinsol Disasta mo Klaemet Jens Komiti** oli ol memba blong wan wan provinsol teknikal dipatmen mo long Non-Gavman Oganaesesen (NGO). Long taem blong disasta oli raetem ol komuniti ripot mo mekem ol proposisen blong aksen plan wetem ol patna. Oli kodinetem teknikal asesmen mo rispons long provinsol level.

### **Munisipal Kaonsel mo Wod;**

Bae oli mekem semak samting wetem ACS long taon mo long PENAMA.

**ACS (Area Council Secretary) - Eria Kaonsel Sekretari** hemi ol man we oli wok blong gavman long aeland level. Olgeta nao oli linkim ol CDCCC mo PDCCC.

### **CDCCC (Community Disaster and Climate Change Committee)**

- **Komuniti Disasta mo Klaemet Jens Komiti** hemi ol komiti we ol komuniti oli jusum olgeta blong givhan long wok blong NDMO. Oli wok olsem volontia (long hat blong olgeta nomo olsem ol jif). Oli helpem komuniti blong oli rere mo oli pasem ol alet. Afta long wan disasta oli mekem fes komuniti asesmen wetem ol lida blong komuniti sapos oli rili nidim sapot long aotsaed.

## AKTIVITI 2.2: SETEMAP KOMUNITI DISASTA KOMITI (CDCCC)



### Objektif



- Mekem klia ol rol mo risponsibiliti blong ol CDCCC mo ol eleksen proses.
- Elektem ol CDCCC long komuniti.

### Taem blong karemaot wok



- Haf dei o mo folem saes blong komuniti.

### Fasin blong karemaot wok:



- **Sapotem jif blong oganaesem ol eleksen blong CDCCC** stret afta long presentesen blong DRR Program.
- **Tokbaot ol rol mo risponsabiliti blong CDC mo ol eleksen proses** i go long komuniti. Yu save yusum flip jat mo smol hanbuk blong CDCCC ol mo risponsibiliti.
- **Komuniti i jusum ol CDCCC memba** folem ol rekomendesen blong gaed.
- **Ol CDCCC oli saenem rejistresen fom** (peij 49). Jif, ACS mo Fasiliteta blong DRR oli mas saenem tu blong luksave CDCCC ia.

### Ki infomesen



- Hemi impoten se ACS hemi sud witnesim eleksen blong CDCCC. NDMO ofisa tu oli sud witnesem.
- Ful komuniti i sud patisipet long eleksen blong ol CDCCC.
- Ol CDCCC memba oli mas volontia mo gat ol stret kapasiti blong mekem wok ia.

### Materiel mo risos



- Disasta plan – Rejistresen fom blong CDCCC.
- DVD – CDCCC Rol mo risponsibiliti flip jat.
- DVD – CDCCC Rol mo risponsibiliti hanbuk.

## CDCCC ELEKSEN PROCESS



**1 CDC HEMI SAVE GAT 8 KASEM 10 MEMBA** blong ol komuniti we i gat **50 KASEM 500 PIPOL**.

**KRITERIA BLONG NOMINESEN:** Komuniti i sud nominetem ol memba we oli presen long taem blong eleksen mo we oli agri. Memba ia i mas filim se hem i save handelem posisen ia.

**FULMAP CDCCC REGISTRESEN FOM** mo pasem i go long Eria Kaonsel Sekretari taem hemi stap. Sapos i no stap yumi mas kasem hem befoen blong yia.

### ELEKTEM BAKEGEN

Haf blong CDC evri 2 yia o taem samfala oli aot.

**GIVIM OL NIU KONTAK** blong ol CDCCC evri yia i go long Eria Kaonsel Sekretari.





**OL ROL MO RISPONSIBILITI BLONG OL CDCCC**

**BIFO LONG DISASTA - PRIPEDNES WOK**



**DIVELOPEM WAN KOMUNITI DISASTA PLAN**

- CDCCC i wok wetem Eria Kaonsel Sekretari mo NGO blong gat wan Komuniti Disasta Plan (faenemaot denja ples, sef rod mo sef ples, mekem lokol woning...).
- Plan ia NDMO bae i apruvum



**LIDIM KOMUNITI AKSEN PLAN MO KOMUNITI WOK**

- CDCCC wetem sapot blong ol jif oli mas mekem mo apdeitem wan komuniti aksen plan blong daonem ol risk.
- CDCCC i lidim ol komuniti wok blong daonem disasta folem aksen plan ia.



**MEKEM AWENES LONG SAED LONG REDI LONG DISASTA**

- CDCCC i mas givimaot awenes long komuniti long saed long hao nao blong redi long wan disasta.
- Oli mas talem wanem nao ol alet, wanem blong mekem bifo, during mo afta, mo ol rol blong CDCCC mo ol komuniti memba.



**MANEJEM OL TUL MO MEKEM FANRESING**

- CDCCC i mas mekem fanresing blong sastenem ol tul blong hem (emejensi fand, Bateri blong redio, Fes eid bokis...).

## **TAEM LONG DISASTA - RISPONS WOK**



### **PASEM ALET I GO LONG KOMUNITI**

- Ol CDCCC oli mas harem redio ol taem blong kasem ol alet mo oli mas givimaot ol mesej i go long komuniti blong oli mas rere.



### **LIDIM AKSEN PLAN MO KOMUNITI WOK**

- CDCCC i mas helpem blong muvum aot ol pipol i go long sef ples speseli olgeta we oli no strong (volnarabol).
- CDCCC i mas lukaotem gud ol spesel nid olsem ol olfala man/woman, mama we i gat bel, pikinini, sik man/woman/ yangfala mo ol disebol.



### **MEKEM AWENES LONG SAED LONG REDI LONG DISASTA**

- CDCCC oli mas mekem asesmen long komuniti mo pasem asesmen ia i go long Eria Kaonsel Sekretari.
- Taem komuniti i stap wet long rilif oli save statem ol aksen blong rikavari.
- Sapos Komuniti i save handelem disasta hem wan nomo bambae i no nidim asesmen.



### **SAPOTEM NDMO BLONG SEREM OL RILIF**

- Sapos i gat bigfala damej NDMO bambae i mekem wan rispons. Long taem ia ol CDCCC oli mas givhan blong seremaot ol rilif saplae i go long wanwan haos.



## AFTA LONG DISASTA - RIKAVARI



### LIDIM KOMUNITI WOK BLONG FIXIM MO KLINIM KOMUNITI

- CDCCC i mas lidim komuniti wok blong klinap mo fiksime ol damej long komuniti, speseli ol samting blong komunitii olsem komuniti haos o nakamal, wota tank, mo ol haos blong ol volnarabol we oli nidim help.



### MEKEM AWENES BLONG STATEM LAEF BAKEGEN

- Afta wan disasta ol CDCCC oli mas mekem awenes olsem planem ol 3 manis kakai, strong kakai, mekem strong haos mo wasem han. Hemia nao bae i helpem komuniti blong statem laef bakegen afta wan disasta.





**Jenda balens**

I sud gat semak namba blong man mo woman.



**Komuniti lida**

Jif, pasta, Jeaman blong ol nara komiti ...




**Ol komuniti grup**

yut, woman, man, olfala, spesel nid, man kam...



**Lokol gavman oganaesesen**

Skul tija, helt woka...



**Evri vilij o stesen**

i sud gat wan CDC.




**JEAMAN**

Representem ol CDCCC wetem ol nara patna olsem ACS, NDMO, NGO, VRCS, hemi toktok plante wetem jif. Hemi oganaesem ol miting wetem ol CDCCC mo hem nao i stap tekem las disesen.



**SEKRETARI**

Tekem not long evri miting, putum apoenmen mo ol notis long notis bod, mo hem wetem jeaman oli apdeitem komuniti long wok blong disasta.




**TRESERA**

Manejem mani long kas bokis or long bank akaon, mo hemi lidim fanresing, mo oganaesem fea distribusen sapos hemi nid, mo hem nao bae i pem evri samting.



**KOMUNIKESEN**

Man blong harem radio, teleradio mo harem fon ol taem. Hem i wan teknikal peson we I save andastanem ol mesej mo fiksिम ol elektrik samting.



**AWENES**

Oganaesem awenes mo mekem kodinesen wetem ol nara patna, mo rimaendem evriwan long ol rols blong olgeta hemia inkludum ol CDC mo ol komuniti memba. Hemi sapos blong gat 2 person blong fokal poen.



**FES EID**

Lidim fes eid tim long taem blong disasta mo lo gudfala taem tu mo lukaotem fes eid kit, oganaesem rifresa kos blong fes eid wetem helt woka mo ol volontia.



# FOM: CDCCC REJISTRASEN FOM

COMMUNITY DISASTER & CLIMATE CHANGE COMMITTEE (CDCCC)				REGISTRATION/CONTACT LIST			
LOCATION:	COMMUNITY	VILLAGE(S)	AREA	ISLAND	PROVINCE	National Disaster Management Office (NDMO)	
NAME:						Phone: +678 22699/ +678 23035	
CODE:						Email: <a href="mailto:ndmo@vanuatu.gov.vu">ndmo@vanuatu.gov.vu</a>	
						Post: Private Mail Bag 910, Port Vila, Vanuatu	
<b>ESTABLISHED &amp; APPROVED BY</b>							
ORGANISATION	OFFICER POSITION	GENDER M/F	FIRST NAME	FAMILY NAME	CONTACTS PHONE/RH	DATE SIGNED	SIGNATURE
ACTIVATOR	VRC/NGO						
NAT GVT	NDMO						
PROV GVT	↓						
	↓						
	↓						
PROV GVT	Area						
	↓						
	↓						
<b>MEMBERS AGREEING TO ROLES &amp; RESPONSIBILITIES (ATTACHED)</b>							
	POSITION	SECTOR ORGANISATION	GENDER M/F	FIRST NAME	FAMILY NAME	CONTACTS PHONE/RH	DATE SIGNED
1	Chairperson						
	↓						
2	Vice-Chair						
3	Secretary						
4	Member						
5	Member						
6	Member						
7	Member						
8	Member						
9	Member						
10	Member						
NDMO REQUIRES A CDCCC HAVE NO LESS THAN 5 PEOPLE							
<b>CHAIR PLEASE UPDATE DETAILS EVERY YEAR WITH AREA SECRETARY</b>							
NDMO RECOMMENDS A CDCCC HAVE NO MORE THAN 10 PEOPLE - PLEASE CONTACT YOUR AREA SECRETARY TO DISCUSS THE NEED FOR A LARGER GROUP				KEY DATES		COPIES	
GOVERNMENT USE ONLY				REGISTRATION:		L VRC/NGO	
CCDC CODE				NEXT UPDATE:		<input type="checkbox"/> NDMO	
Officer Registering				CHANGES:		<input type="checkbox"/> PROVINCE	
Date						<input type="checkbox"/> CDCCC	



### Objektif



- Toktok plante wetem komuniti blong daonem wanem nao oli ekspektem long DRR program ia.
- Mekem sua se ol komuniti memba oli filim se program hemi blong olgeta.

### Taem blong karemaot wok



- 1 hawa.

### Fasin blong karemaot wok:



- Mekem **gem blong Wanem i stap insaed long bokis**
- **Talemaot wanem nao DRR program blong yu i wantem mekem** long komuniti mo hao nao bae yu save givhan.
- **Mekem ol grup diskasen** blong oli toktok raon long ol responsabiliti blong oganaesesen blong yu mo komuniti long taem blong DRR aktiviti mo raetem long wan bigfala pepa.
- **Ol grup oli presentem** ol bigfala pepa ia blong ol i go long komuniti.
- **Anserem ol kwesen** mo mekem sua se evri man i kasem ol tingting blong projekt ia.

### Ki infomesen




- Evri komunti oli difren, no tekem se bae evriwan bae oli mekem samting semak.

### Materiel mo risos



- Bigfala pepa/ maka.
- Ol materiel blo bokis game.

## Wanem i stap insaed lo bokis ia ? (luk long nekis peij)



Hu hem i hu (Komuniti, Ejensi, Dona) mo from wanem?



## GEM: WANEM I STAP INSAED LONG BOKIS IA

### STAMBA TINGTING BLONG GEM

Stamba tingting blong gem hemi blong soemaot se hemi impoten se komuniti i tekem pat long DRR Program.

Gem ia tu hemi blong soem se komuniti hemi i save gud ol problem blong hem, ol wiknes mo pawa blong hem.

Gem ia hemi gud blong mekem se ol man oli no fraet fraet.

### OL MATERIEL WE YU NIDIM BLONG KAREMAOT WOK

- Wan bokis mo sam smolmol samting we bae yu haedem insaed long bokis (olsem pen, smol ston mo ol narafala smolmol samting).
- 3 volontia.

### HAO NAO BAE YU MEKEM WOK IA?

#### 1- Askem long 3 man insaed long komuniti blong kam plei gem ia.

- Fes man bae i sekem bokis nomo mo bae i traem blong talem se wanem i stap insaed.
- Nambatu man bae i putum han blong hem insaed long bokis ia mo tajem samting insaed long bokis ia, bae hem i no save luk insaed long bokis ia. Taem hemi i tajem samting ia, man ia i sud traem blong talem wanem ia i stap insaed long bokis ia.
- Nambatri man nao i save luk insaed long bokis mo talem wanem ia insaed long bokis ia.

#### 2 - Long nara pat blong gem ia komuniti memba nao oli save talem se huia hemi plei rol blong :

- Dona – Ansa : *Man we i harem nois blong samting ia.*
- Ejensi we i ranem program Ofisa – Ansa: *man we i tajem samting ia.*
- Komuniti memba – Ansa: *man we i save luk mo tajem samting ia.*

#### 3- Askem olgeta blong toktok mo talemaot from wanem nao oli jusum olsem.

#### 4 - Konklusen i sud go olsem.

Ol trifala man ia oli sud save wanem ia nao i stap insaed long bokis , blong save wanem nao ol problem blong komuniti, olsem volnarabiliti mo kapasiti blong komuniti.

● **Dona** hemi no save wan samting long komuniti (hemi no luk mo hemi no tajem) mekem se hem i yusum ol ejensi blong helpem hem blong gihan long komuniti.

● **Ol ejensi** we oli stap wok wetem komuniti oli save smol (oli tajem nomo) long komuniti mo oli save long dona we i gat mani, mekem se hem i save helpem komuniti blong yusum mani blong dona.

● **Komuniti** (hem i luk insaed lo bokis) bae i save stret wanem nao ol problem, vonrabiliti mo kapasiti. Rol blong hem i blong daonem ol bigfala risk.

